

四庫全書

集部

欽定四庫全書

集部

懷麓堂集卷

五十六至
六十

詳校官監察御史

臣

范衷

中書臣劉源溥覆勘

總校官編修

臣

王燕緒

校對官待詔

臣

胡士震

謄錄監生

臣

劉澹

欽定四庫全書

懷麓堂集卷五十六

明 李東陽 撰

詩後稿六

七言律詩

應制啟沃詩十首

欽蒙皇上遣太監載義傳示聖意命臣等各撰詩十首用
寓啟沃臣等聞命驚惕謹擬十題撰成七言律詩各一首

繕寫進呈伏望萬幾之暇俯垂電覽臣等不勝榮幸之至

敬天

理氣流通自古今每從人事識天心災祥有應皆仁愛
日月無私並照臨直以精誠昭上下敢於茫昧託高深
願將敬德祈周命先獻君王兩字箴

法祖

盛代龍飛定兩都分明武烈配文謨極知聖祖憂勤意
盡是邦家久遠圖禮樂萬年周制作山河一統漢規模

焚香敬讀皇明訓如見艱難創業初

勤政

大禹猶聞惜寸陰祇應無逸是良箴
晨朝屢省千官奏
晁食頻勞四海心
聖世急荒非過計
國風勤儉有遺音
只今苑囿無巡幸
敢學詞臣賦上林

務學

自古興亡一鑑如由來治道此權輿
遺蹤往跡千年事
長晝深宮兩卷書
宸翰有光同象緯
講筵無日不唐虞

請看聖學從家教蒙養如今有正儲

任賢

治體分明在一身股肱元首義俱親求才自合資金礪
愛國還須付玉人千載風雲逢聖作一時魚水見情真
臣心欲效慙無力勉為吾皇贊化鈞

納諫

忠言元不為身謀大海真能納衆流始信適情皆佞口
須知逆耳是嘉猷虞廷屢有陳謨拜漢室頻聞下詔求

試看古來青史上直臣明主一時收

節用

君王儉德小民知
徃代流傳盡可師
階土僅存三尺制
露臺真惜百金貲
豐凶豈必歸年歲
出納惟應付有司
擬效魏徵陳十漸
敢忘更化改元時

愛民

圓顱方趾是同胞
眼見昇平樂稚髦
祇恐顛連非舊業
極憐辛苦盡秋毫
東南財力徵輸竭
西北軍儲餽餉勞

願向天瓢分一滴徧將恩雨灑蓬蒿

恤刑

民命須關獄重輕我皇於此最留情真看筆底災祥判
要使人間曲直平法遇變時仍守舊罪當疑處每求生
覆盆恐有幽陰地離照終教仰大明

講武

百年至治擬華勲安不忘危舊所聞周代守成方詰武
漢廷習射本稱文營兵夜靜千山月苑馬晴看五色雲

佇看王師清紫塞秋高無復射鵰羣

寄題姜貞菴壽藏

和得司空谷裏詩早從塵世脫天羈紅顏白髮有歸處
山月江風無盡時地下菟裘人未老樹頭華表鶴先知
君看五馬經行路已築漳南太守祠

病起述懷

一病經春似隔年三章請老未歸田極承優詔丁寧語
又拜威顏只尺天夢裏黃扉驚再到局中青簡待重編

惟餘一寸丹心在猶繞紅雲向日邊

壽太宰尹公八十

三朝舊德聳冠裾曾是昂藏一丈夫老眼閱人猶水鑑
壯心憂國更江湖年高合受隣翁拜身健時嗔稚子扶
七十二泉堪釀酒不知能給壽筵無

哭青谿倪太宰先生

握手藤牀肉未寒重來不覺淚沅瀾山川一代英靈盡
人物三朝作養難班史舊編家繼有山公新啟世傳看

平生愛國憂民意仕路誰堪話肺肝

房山山房相墓道中紀事八首

乞得君恩暫撥忙許從西郭看林莊千年丘壠或天意
百里山川真帝鄉地遠有時驚片堠歲終何處問耕桑
私懷未了憂官事默默無言祇自傷

太行西下水朝東聖代提封一掌中形勝千年今古在
車書四面往來通垂虹影卧長橋日嘯虎聲傳衆壑風
俯仰乾坤雙望眼不知身世是樊籠

歷盡重岡始見山石門高處不容攀塵蹤誤落心期外
舊路遙疑指顧間老樹傲霜猶磳兀斷溪流雪尚潺湲
十年兩度經過地不共遊人一解顏

舊遊長記此山曾又宿慈光寺裏燈吹斷野風猶蒼莽
踏殘岡雪更峻嶒人聲滅盡惟聞鳥民戶凋餘祇見僧
不是行春還問俗宦情離思兩無憑

曉日鳴鐘出寺遲峰巒詰屈路逶迤輕輿傍險頻勞下
健馬乘高不受騎出甕酒當秋熟後隔村雞報午炊時

老親褲子何曾到一句詩成一淚垂

望遠登高數里程雪消風煖愛新晴緣崖健婦如猿捷
荷擔羸僧似鶴輕直以榮枯占地力還從嚮背識山情
前岡恐有牛眠處倦馬臨溪駐復行

下馬西林一辦香古槐陰裏拜幽堂百年戰伐中興地
兩世恩封異姓王寶劍有光衝夜斗石麟無影卧斜陽
錦衣公子能留客白飯青芻意正長

時憩英國
張公先墓

出城三日兩衝風與馬歸時日過中地遠極憐僮僕苦

愁多非為路途窮
陶松歲晚門誰候
謝草春遲夢亦空
病眼不禁雙淚冷
自歎烏帽解紗籠

哭傅白會郎中用體齋見慰韻二首

秋來哭子正酸辛
恨入通家意更真
寄我尚題前月信
惜君猶是後生身
江山荏苒年華盡
夢寐分明笑語親
因與大蘇談舊事
半床風雨兩愁人

登科猶記歲逢辛
曾見趨朝畫裏真
應與傳巖為後裔
定知何遜是前身
文章飾吏誰兼美
兄弟論交我最親

月落屋梁秋暑冷憶君還似夢中人

東山先生有兩廣之命奉寄一首

聽漏西堂黯不眠憶君如在夜燈前
可堪環堵三年病又上南州萬里船
縮手未閒終坐巧踰垣欲避轉愁偏
行藏在我今須識縱不由人也屬天

王古直輓詩次方石韻二首

漫浪乾坤有歲年不知官府更神仙
吳山越水重來地明月清風未了緣
五夜詩篇還獨賞

嘗問古直云何以
消夜答云夜半時

起將自所作舊詩念一念耳

一時諧謔盡堪傳從今脫屣無遺累免

賣蘇家二頃田

自將詩卷祭殘年斷送平生賈浪仙久客耳通南北語

故人心結死生緣

古直間方石來曰吾事濟矣
踰年而卒方石為殯殮葬之

文章豈

必千金價姓字聊應一代傳不用莊名題萬柳

方石欲與之萬

柳莊不果

本知滄海是桑田

再哭青溪

海內衣冠失老成夢中精爽尚平生杏園醉後千花擁

柳院歸時一字行舊事蒼黃空過眼暮年幽獨轉傷情
不須更作三同會又聽城西薤露聲

時體齋亦已捐館

哭體齋傳宗伯先生

是日倪公祖奠畢於傳公會歛

哭罷青谿又體翁素車匍匐走西東白頭搔盡渾成雪
淚眼啼多不受風翰苑才高經百戰南宮官重說三同
傷心更是江樓鴈各自分飛落照中

體齋已喪弟故云

再哭體齋疊見慰哭子韻

公來慰我極酸辛我哭公來意更真山斗正懸天下望

簿書長繞病中身

公病殆猶手削奏案

一門和氣芝蘭共四海交

情管鮑親定與青谿重握手九原之下復何人

送吳學士克溫之南京

玉堂風月每平分止客南來又送君千里山川非遠別
兩都詞賦舊能文亭邊野興隨修竹江上歸心駐白雲
二十年前曾此夢不勝吟望立斜曛

送羅司業允升之南京

金陵王氣還雙闕璧水文章重六經官好況當初攝篆

時祭酒缺司
業始復設

門高曾憶舊趨庭

允升父嘗為
南京助教

烟隨草色

連天遠雨過山光撥眼青多病祇今思藥物擬從新寵

問參苓

卜樹村新莊約方石先生不至次韻四首

浴沂真樂許同尋過眼春光次第深病裏有官虛歲月
老來無夢不山林天教剩地堪容膝我愛清泉好洗心
却恨可人招不至空將短札代長吟

路繞湖堤不費尋野人遙指草門深平田水足元通澮

獨樹陰多自作林看竹偶逢曾識主買田先了欲歸心
不知風月還多少消得先生一醉吟

偶從僻地得幽尋門掩疎籬一徑深風定落花還作陣
雨多遺果漸成林百年遊賞浮生夢兩世經營舊主心
更憶老親兼稚子不勝哀思與微吟

老樹盤空過十尋綠陰繁護古亭深村炊幾處日當午
牧笛一聲風滿林逝水如斯真在眼浮雲於我更何心
房山險絕今辭盡贏得西湖漫浪吟

壽祭酒羅先生七十次所寄韻二首

登第同年事憲皇看君射策勝穿楊兩都賦出爭傳漢
九老圖成正憶唐舊日才賢多鼓鑄老來神采尚飛揚

也知憂國懷人意不問寒暄問雨暘

來詩云變調事業
須公等卧看南山

記雨
暘

十年不見先生面忽枉西江第二詩郢客高詞慚寡和
杜陵新贈怯輕為多收野秫貧堪醉久服山芝老不饑
萬里雲霄三月近報書猶恨鶴飛遲

松憲屠公輓詩

老健全輕玉帶圍餘歡猶及綵衣歸乾坤樂事古來幾
湖海耆英公後稀滿坐芸香留宿雨半窻松影下斜暉
樹頭華表高墳在時有行人指翠微

次李白洲侍郎督復西涯舊業韻二首

面對青峰俯碧流三間矮屋一重樓山高合柱王郎笏
水濶堪容范蠡舟詩客苦曾逢戴笠釣心閒不在垂鉤
舊時風景如重到日日慈恩寺裏遊

招提南畔石橋邊
水色山光淨可憐
送隱預勞盤谷序
得歸何必洞庭船
總多壇樹宜春服
不信樓鐘攪夜眠
寄謝汝陽三斗客
未妨來作飲中仙

慰東山劉司馬哭子次謝祭酒韻二首

十日朝回不出門
兩翁孤坐各黃昏
炎風朔雪蕭條過
舊恨新愁次第論
問業有詩空鯉退
破懷無計且鯨吞
此籌可但輸君恨
老眼猶堪對子孫

定省何人夜候門
客堂無語一燈昏
三生過眼真疑幻

萬事從頭莫更論
愁對燕山身獨老
恨深雲夢氣須吞
君情似覺全勝義
我已無兒況有孫

張尚絅侍郎輓詩

卧病經秋樂裏中
入春鄉思太匆匆
十年心苦移家地
兩世名成教子功
遼海幾時歸去鶴
塞書無復寄來鴻
因懷詩酒過從處
一夜高情笑語空

弘治癸亥二月四日雨中再代視牲紀事一首

宿靄全消輦路塵
遠將天語問犧人
郊壇二月稀逢雨

使命三回尚及春
龜卜有期先後易
駿奔無地往來頻
聖躬已豫思蠲潔
願達平安上紫宸

次陳德卿顧士廉喬希大韻三首

兩年春興總相孤
百感重來更鬱紆
舊事有形歸夢泡
浮生無處問方壺
馬猶識路人何在
土未成墳草又枯
四海極知同父子
不知還似此情無

祇樹林開日正中
玉泉漸下水還東
十年丘壠瞻依近
百里川原眺望空
敢謂并州非客舍
極知羸博有遺風

良辰好景多相似只對愁人便不同

看盡朝暉又夕陽舊時風景更難忘
鳥情空解憐山色草淚猶知泣露光
豈謂幽明分骨肉敢將窮達論文章
從今不作江南夢祇合辭官老帝鄉

南屏遷翰林典籍白洲有詩次韻二首

東帛丘園滿路光十年詞苑尚回翔
籤題徧檢書千卷誥草頻揮墨萬行
名重豈須還甲第地高何必更巖廊
浮雲過眼真餘事不向官階較短長

幾年淵底愛珠光一日雲端羨鳥翔
白雪調應高鳳沼青袍名已動鵷行
交遊有道懷金石薦達無能恥廟廊
同是感時憂國者向來情話夜何長

復畏吾村舊瑩志感十首

舊壠蕭條二畝秋眼中無地著松楸
比隣價許千金直老我心餘一念休
未愛林居添野意直開神道想靈遊
幽堂手澤依稀在細認蒼苔幾涕流

時於明堂得券石乃先考手書方向

始定

原頭高冢鬱龍從我祖殷勤手自封四世禮宜昭穆序
百年心苦歲時供開雲旋闢墻東地帶雨新移屋後松
說到九泉應一頷願從遺跡想音容

行盡房山復樹村三年岐路幾銷魂山占水卜無時定
鬼護神訶此地存假手經營煩舊主白頭瞻拜有孤孫
西園宰木東原草猶是春風長養恩

白頭遺姊說當年

有鄒氏表姊年七十餘能道墓時事

聽到殘燈各黯然

地許精靈先後合天教骨肉死生全流光老至偏成感

舊事疑多敢浪傳今日重來如夢裏
龍頭新樹墓前田
兩年清淚不成乾三尺孤墳欲葬難
千載抱孫心敢負
九泉將母意須安情知季札猶懷土
義比文公合去官

今日一杯重酌汝可將頑健詫加餐

兒東行道中有詩云報道癡頑今健

飯不須傳示教加餐

五父衢邊淚滿巾舊愁未盡轉成新
九原可作真疑夢
三鼎空踰不逮親骨肉竟同歸復地
衣冠非是顯揚身
心長夜短清無睡坐久村雞又報晨

今夕何夕宿城西
燭影下照茅簷低
茶烟颺空月冉冉
竹露灑地風淒淒
髮能幾許白且盡
心向此時荒欲迷
總為劬勞德未報
老來無事不悲悽

舊冢新塋次第成
盡將心力付平生
經旬命鍾隨高下
半夜推窻看雨晴
今日山川增秀麗
向時狐兔大縱橫
小西門外休回首
蔓草殘烟也繫情

愁來不覺淚潛潛
枕上詩成鬢已斑
信有神交還夢接
爭知地下與人間
弔餘草人空到望
斷孤雲鳥不還

又是雨餘花落後有誰携酒共登山

後四句五月二十九日夢中作覺後

續成之時夢見吾兒若不欲聞吾詩者意苦甚蓋自是斷不復作矣三十日識

都城西下石橋東十里川原四面通
僧飯午鐘洪慶寺
洞簫涼月靜虛宮
鄰多雞犬知村近
祭有田園及歲豐
兼是白頭歸老地
未論丘首得相同

曾司空七十

童丱相隨已白顛
看公先到古稀年
門臨御苑朝偏近
位重官曹席每專
暇日不妨留客醉
多情兼喜抱孫眠

華筵緩奏長生曲欲借南風起舜絃

楊給事麓父母壽詩

鄭公鄉里世稱賢陶母家聲衆所傳
款段車輕猶舊路屠蘇酒熟又新年
庭栽桂樹還生子地近桃源不問仙
五色宮袍千歲酒門前須繫省郎船

一舫齋詩二首

十畝青山八九椽卧遊聊以屋為船
星槎有路疑秋泛波浪無聲攪夜眠
東海添籌非浪語南華飄瓦亦同篇

也知白髮詩人興不在蘆花淺水邊

木蘭為柱桂為椽陸地從來別有船縱飲直疑騎馬坐
無愁何必對江眠七重漫擬歐公記萬厦還歌杜甫篇
聞道銀河通碧海恩波元自斗牛邊

懷麓堂集卷五十六

欽定四庫全書

懷麓堂集卷五十七

明 李東陽 撰

詩後稿七

七言律詩

送衍聖公聞韶襲封還闕里

夜來佳氣繞門闌
曉聽郎君已拜官
魯郡山川歸舊國
孔林蘋藻薦新盤
田無公稅堪為養
家有遺書正好看

從此雲霄是平地
道途長為報平安

贈闕里孔聞禮

南溪聖公次子

少年文采動公卿
剩說尼山有俊英
千載衣冠三氏學
五更鐘漏九重城
極知東嶽瞻雲意
酷似西堂聽雨情
寄謝南溪溪上水
幾時容我棹舟行

方石先生祖母趙節婦沒已五十年
方石以禮部侍郎誥請移為旌表為詩紀事奉次二首

鳳函飛度越江遙
江上離鸞恨始消
故國山川增秀拔

舊家門戶起蕭條詩書澤遠傳三世雨露恩深浹四朝
從此貞心長不死九泉披豁見層霄

路接清風嶺未遙

清風嶺
台州事

舊鄉遺俗豈全消百年始報

生成德六館重開節義條星小竟隨孤月照江清恥受
惡溪朝先生不為彝倫起茲事何因徹九霄

又二首

故家華胄本非遥薄俗真堪鄙各消始信忠臣元有訓
誰言孝子不同條

謝高祖孝
子諱溫良

陰晴到底天須定江漢何

心海自朝多少窮殘委溝壑夜臺無力叫重霄

思山夢嶺路非遙

謝有思山改會總又山名大夢皆世墓

舊事多從話裏消看取

霜松高萬丈任他風柳弱千條絲綸命許兼先代

謝始欲移所得誥命

詔併與之

竹帛名應載本朝昨夜文星連婺女共將光彩動青霄

次李白洲六十自壽韻

宦情元不因詩魔白戰猶聞夜枕戈南去扶搖無限路
此來安樂有行窩孤松歲晚心能壯叢桂秋深影漸多
自愛黑頭雙鬢在每呵青鏡手親磨

送焦守靜先生使襄府

丹書玉節又南行一日龍光起四瀛
新使早占唐李邵舊恩猶識漢桓榮
三朝委質君臣義兩世通家父子情
應向別筵懷往事曲江花底拜年兄

懸車舊第卷為寶慶謝太守公子業題次方石
韻二首

山頭牛背穩如車猶記當年謝事初
地僻有時窮嶺嶠家貧無計問田廬
屋梁落月分明在霄漢晨星次第疎

因過竹林談舊隱幾聲清嘯一長歎

仕塗隨地有推車野服何人得返初老去功名皆外物
舊時山水是吾廬達能玩世心非放清足傳家計未疎
屋不可瞻烏可愛天涯一見一欵欵

愛日樓為錢郎中榮作

白日紅顏映鬢絲百年心事此樓知生憎暮色經簷短
每恨晨光出海遲寸草有春猶物類長安雖遠未天涯
綠衣催進長生酒莫待高庭樹影移

榮壽樓為仲僉事本作

百尺高樓肯構新郎君家有白頭親駢羅合敬長生宴
升降全輕未老身潑眼湖光堪釀酒卷簾山色似娛人
豸冠驄馬朝天路夜夜憑闌望北辰

病中言懷八首

三年病後強趨朝又擁重門卧寂寥夢繞千山心不定
枕歌雙臂力全消籠燈月暗疑無影園雪風稀未滿條
睡起忽然忘握髻不勝愁鬢晚飄蕭

瓦爐初冷更添香更漏沉沉月轉廊身老病隨年共至
愁多心與夜爭長塵編倦掃時防蠹籠樹新移尚怯霜
自笑閒情緣底在向來公事已全荒

身病何如目病難極知昏眊勝衰殘愁來強閣東門淚
老去從歌杜甫冠新酒縱篋仍斷飲好書雖借懶開看
枕邊莫道無餘事猶有詩成字未安

門掩疎籬雪滿池夜寒惟有病先知冰輪影薄當窻近
竹葉聲稀到枕遲三徑業荒秋去後十年心苦夢醒時

一身經濟元無術醫國如今合付誰

返櫂湖南路已微買田陽羨事多違老看天地餘生少
遠別江湖舊伴稀靈圓藻深魚尚在故林松暝鶴還飛
天寒歲晚無聊賴吟倚高樓送落暉

東歸重下潞河船猶有江山未了緣望遠真窮滄海際
登高空指泰山巔流光轉眼清秋過往事經心白晝眠
寂寂閉門多病裏始知遊賞是神仙

高梁橋北畏吾村瓏樹成行石獸蹲豈謂驅除非舊主

金匱要略卷五十七
始知封表是君恩愁來霜露情多感老去烟霞癖尚存
已辦輕車隨款段挂冠須向國西門

幾回班召入彤扉又向經筵勸講歸溫語問時勞睿想
霽顏開處識天威相如病久經旬卧汲黯身長與願違
萬里雲霄雙倦翼側看鸞鵠讓回飛

郊壇分獻得夜明

夜色燈光遠近中廣寒元是水精宮九重闔闔隨高步
萬里山河入半空歌罷樂聲還徹外拜時人影盡朝東

高明願託無私照四海長瞻配日功

慶成宴次焦少宰韻二首

南郊禮罷及辰良春殿筵開愛日長
神旒已沾頌後胙宮衣猶帶祭時香
旌旗簇擁千人隊袞繡分明五色光
乾飲滿斟皆聖語共將涓滴報吾皇

共隨經幄輔元良玉署金鑾歲月長
學士幾陪天上宴侍郎還立案頭香
遷宮地隔新曹省賜坐身沾舊寵光
應是老臣偏感事碧桃曾見醉先皇

次李白洲留別韻二首

少日相忘汝與吾老來俱已變頭顱家貧尚有千頭橘
身健何須九節蒲酒興不輸詩力壯野心偏向世情粗
上東門外應回首誰為疏郎作畫圖

俯仰平生不愧吾肯隨弘景歎頭顱歸心白憶霜前鴈
別意青憐水上蒲唐代百篇希世有漢廷三尺本君粗
亨衢不隔安車路回首風雲是壯圖

奉送梓宮至土城哭而有述

郭外宮車駐復行萬方臣妾共吞聲驚飈慘似升遐日
落景深留返照情千載再逢真隔世百身能代敢偷生
清塵望盡猶翹首願作飛雲繞去旌

過小西門懷舊壘有作

古城西北氣蕭森舊路蒼茫不易尋手種青松今易主
耳聞烏鳥更關心山堂尚憶風霜破野徑猶虞鹿豕侵
遙指故原新樹裏晚風吹淚濕衣襟

畏吾村先墓忽枉劉司馬見過感而有詩

滿地悲風起白楊
墮頭斜日半荒涼
巨卿白馬期能到
范叔綈袍義可忘
話舊畧教肝膽盡
憂時同感鬢毛蒼
我來君去何匆促
猶有官曹債未償

奉迎神主觀御容哭而有述是日復大風

園陵北望路迢遙
夜候禪宮坐寂寥
已向人心占夢寐
更從天意識風飈
目瞻遺像山河秀
淚滴空原草樹凋
神御入城當午霽
不堪重拜闕西橋

和方石先生留別韻二首

宦情今日為君微
別卷詩成強自揮
歐冶金鳴孤劍躍
海天雲盡一鴻歸
行蹤得與浮萍似
塵世休言大夢非
何物人間堪更比
向來風槩十分巍

客心鄉路轉依微
回首風塵袂一揮
已起謝安還復卧
未秋張翰忽先歸
桃源再入花應在
赤壁重遊事恐非
試向畫圖占壽考
老來詩骨更崔巍

倫脩撰文敘頒詔安南便道省親

藩邦地重極炎洲
詔使名高出狀頭
一代風雲龍虎會

百年郊數鳳麟遊殊方盡處聞天語舊屋歸時記海籌
採得民風兼國俗玉堂青史待刪脩

正德丙寅正月二日雪

三冬臘雪已無期兩日春風尚及時朝士攬衣驚起早
都人勒馬愛行遲年華過眼人須惜帝力如天物不知
却訝桑林纔六事也能照格應商祈

徐侍讀穆頒詔朝鮮

六龍飛御九重天天上文星下海堦萬物發生新雨露

累朝封錫舊山川
鸞書共識中華字
鳳歷初開正德年
珍重登高能賦手
玉堂青簡待同編

初開經筵紀事

正德元年二月二日是日開講大學

曾侍宮筵入桂坊
又開經幄引鵷行
春秋義重初元歲
大學書陳第一章
講罷天顏猶咫尺
朝回日色半蒼涼
兼金綵幣皆恩澤
四表同瞻聖德光

親耕籍田紀事

二月十五日時陪祀先農且預九推之列

短犁長策共分曹
白石壇空碧殿高
七奏耳聞神聽遠

三推心識聖躬勞伶人曲按新翻譜御酒恩沾舊賜袍
帝業艱難民事苦愧時筋力助分毫

沈編修燾冊封安南

玉堂書史暫休衙銀漢星辰早泛槎已向夏壇分赤社
更從周雅賦皇華主恩前後重頒詔使節從容兩過家
今日贈詩他夜夢紫微枝上月鈎斜

題許給事天錫駐節寧親圖

黯淡灘頭舟若飛安南國裏使臣歸宮恩滿載黃封酒

官樣新裁白澤衣天上兩星當戶動人間寸草自春暉
咨諏本是皇華職隨意周原四牡駢

贈闕里孔以昌

魏闕威儀見兩朝漢雍經史聽園橋烟霄舊路星河近
草樹新恩雨露饒已向雲仍占聖澤還從伯仲識風標
分明闕里牆東地何日尋君再舉鑣

聞劉東山司馬致仕之命是日得謝方石祭酒
到家日所寄詩感而有作

越客書來自海濱楚鄉重見拂衣人名如洛社非同里
詩到梁州各有神萬里雲霄俱稅駕兩山風月自為隣
試將出處論心事慚愧官曹一病身

十年兩度送君歸聽說鄉山興欲飛歲久兒孫頭角變
日長賓客往來稀平橋着板通樵徑老樹盤根作釣磯
強欲相從無舊業定於何處解朝衣

陳司空之南京例贈二首

簿書叢裏日紛龐四十年来老鬢雙水部官高聯八座

石城形古鎮三江秋波艤棹花迎客曉夢趨朝月在窻
兼喜故園衣錦地幾多髦稚擁歸幢

泮水芹香共幾秋曲江花底復同遊君從北省移南國
我已紅顏變白頭舟楫地經生道路盡圖人識舊風流
明年壽骨應全健預寫詩篇當酒籌

木齋先生將登舟以詩見寄次韻二首

十年黃閣掌絲綸共作先朝顧命臣天外冥鴻君得志
池邊躡鳳我何人官曹入夢還如昨世路論交半是新

仄舵歌帆何日定茫茫塵海正無津

暫從中秘輟絲綸同是羔羊退食臣偶為庭花留坐客
豈知宮樹管離人杯餘尚覺情難盡棋罷驚看局又新
極目春明門外路扁舟明日定天津

石封君徐節婦輓詩二首次沈仲律提學韻

試問元方與惠連故家風範尚依然曾同姓字題金榜
不見功名到白顛身後子書能讀父古來人定可勝天
當庭種得梧桐樹直待巢成鳳已鶩

不羨徐家有二雛眼看一一上雲衢九原再作心無愧
萬里生還事可吁敢謂榮名堪比養故知陰教不相誣
嗟予談虎神傷處却恐神傷虎不如

魯編脩鐸頒詔安南

命使炎邦帝選才狀元剛去省元來車從北斗杓前指
詔向南天盡處開史局事嚴應暫輟宮袍恩重許新裁
歸裝不載官中物自寫黃封作壽杯

石學士瑤之任南京

黃金臺上玉為堂剛送羅生又石郎四海豪英唐意氣
兩都風物漢文章舊傳衣鉢吾空老世業箕裘子最良
可與語人今漸少不勝南望立斜陽

題義聲貞則二卷為林知府世遠父母作

三十浮生一夢餘義聲先已動州閭門高鄧尉堪容馬
家富唐侯剩有書歲久佳城雙壁掩恩深令子一官如
褒章兩字同華袞夜夜虹光照墓廬

貞則堂高世所傳栢舟風節故依然道傍綽楔行人駐

天上絲綸內史宣老去深恩猶襁褓生平遺澤尚梧栴
舊家本是瀧岡後長記辛勤教子年

儲都憲靜夫在南曹時嘗取鶴鳴詩義名其園
曰檀園又取杜少陵漢陂詩義名其軒曰淨
拭軒比再入南京請各賦一首

山林城市兩相忘退食官曹白日長正愛庭陰深覆綠
却嫌階葉亂堆黃窺園董子心仍在掃室陳蕃志且償
今去行臺還種栢可應重和伐檀章

紅花碧葉照清池長憶東曹坐對時縱有塵埃無地著
絕無雕飾有天姿年華過眼頻經幾風景撩人更屬誰
官署不同心賞在也應重和少陵詩

孝宗皇帝禪祭有感

病羽無心逐鷺行偶因祥禪憶先皇三年淚盡蒼生血
萬古名齊日月光天上神靈龍變化廟中音樂鳳趨跄
無由執紼橋山路空負西陵一瓣香

王永嘉獻臣恩養堂王自御史謫海南以詔例

量移今職

曾是中臺執法臣，親從天上捧絲綸。
一身去國將三載，萬里還家有二親。
手種椿萱堪比壽，歲供魚笋未為貧。
河陽縣裏花無數，祇得東風一半春。

守靜先生得曾孫席間奉賀一首

家書何止問晨昏，報道靈芝更有根。
已喜一門為太史，最難三世見曾孫。
直教簡冊書香遠，轉覺鄉邦行數尊。
從此小同稱大阮，衣冠盛事好重論。

元日看牲復命紀事一首

己巳歲是日有
廟牲節食之賜

履端新制未傳宣復命先承黼座前名秩正當華蓋殿
封題猶是戊辰年豈應衰老仍供職敢謂精誠不愧天
歸到玉堂重拜賜可將恩海報微涓

郊壇分獻再得夜明

塵土全消半夜風冰輪初徧廣寒宮分壇位出星辰上
萬象光懸宇宙中燭氣入雲烟縹緲佩聲和樂響丁東
神心豫悅天顏喜願佐憂勤保聖躬

懷麓堂集卷五十七

欽定四庫全書

懷麓堂集卷五十八

明 李東陽 撰

詩後稿八

七言律詩

恭進孝宗實錄紀事一首時雨中霽駕迎實錄
入奉天殿方陞座前此所未有也

寶冊雲輿次第登殿頭飛雨過觚棱衣冠夾陛班初引

萊鳥迎門座始升五載音容思玉几萬年功德付金滕
三朝史筆今重載欲報先皇恐未能

西苑焚稿紀事

五月二十五日在海子西岸事畢尚膳供宴是日入西苑門望

南臺登廣寒殿過芭蕉園而還

史家遺草盡成編太液池頭萬炬烟天上六丁元下取
人間一字不輕傳先朝故事非今日內苑清遊亦勝緣
却上廣寒雲霧裏禁城東指是文淵

秋日出郭崔甥有詩因次韻

直從亭午坐斜陽却借南薰作晚涼沙路試看騎馬快

是日試
賜馬

玉堂剛謝攬衣忙移將攏樹和雲種拚得園葵

帶露嘗四十六年公事裏向來塵夢一何長

哭內弟劉釗三首

忽聞哀報已沾衣回首長天送落暉別後肝腸吾弟盡
到時舟楫汝兄歸平安兩字書空在去住三生事總非
欲與親交同舊感向來門下客全稀

官路多年改鬢毛豈應容易着青袍民貧况值饑荒後

政拙誰知撫字勞遺恨可能忘骨肉歸舟猶恐限風濤
空山落木傷心地欲為招魂賦楚騷

兩因圍棘誤登科

劉當以予主考引嫌不入鄉會試各一次

一去長江委逝

波官好不嫌州縣小家貧翻恨子孫多思君豈但三秋
隔老我平添兩鬢儲寂寂閉門愁病裏有誰情話一來

過

松露周太保與王端毅太師楊遂菴都憲皆有

詩贈喬希大太常題卷一首

石渠丰采重如山松露清風尚可攀堂上草玄親問業
朝中玉笋舊聯班片言價出千金上一日心勞百過問
老我相思不相見摩挲亦為解雙顏

松露再召復致政將歸留話用前韻

白馬翩翩走碧山青雲逸駕許重攀遠從西晉來千里
同遙中朝第一班詩興直凌飛鳥上歸舟仍在急流間
多情話別留歡地猶是當年夢裏顏

松露壽七十再用韻一首

并州西隔太行山百尺丹崖豈易攀却望故鄉還憶賈
恨為仙馭不同班風雲運合逢天上山斗名應滿世間
細數百年從七十漫將靈藥駐紅顏

聞孔氏女至

南風吹送北河舟有女東來慰白頭病裏心情無那老
別來風景又經秋鵲聲報日書先到雨脚乾時淚始狀
預想離程還在眼難將一笑解千憂

與衍聖公夜話

漫以平安慰別離
星槎動是隔年期
文章義豈千金重
骨肉心應兩地知
留住每愁冰合早
出游常恐夜歸遲
須看闕下重逢日
莫忘燈前共話時

劉太宰入閣後省墓例送一首

東曹地近入黃扉
盛事今無壽古稀
天祿閣中藜火動
相州堂上錦衣歸
新頒綸綍封三世
舊種松楸過十圍
恩詔祇應教暫去
及時勲業肯心違

豐諭德原學掌院南京例贈一首

玉亭元向玉堂開修竹陰陰對古槐夢裏山川吾老矣
望中騶馭子行哉青錢選出知文價石室書成見史才
東向越山時駐馬白雲應肯渡江來

泉山書院詩

甘泉山下挹清風得似滁陽有醉翁嵐氣每隨天早晚
水聲長遶屋西東千尋峭壁瞻依地萬頃平田灌溉功
二物古來堪比壽願登巉巖截寫琤琮

城南姚氏園餞劉太宰與諸史部晚會歸得三

首

不到城南又隔秋，偶因送客駐行騶。
枝梢宿雨衣猶濕，樹底斜陽席未收。
豈謂東曹非舊約，須知下界有仙遊。
壁間漫作題名記，聚散終同水上漚。

園上高亭園下池，秋來風物兩相宜。
紅衣落盡蓮初實，碧葉凋殘樹總垂。
江左故人傷別久，遠卷當憇此園省中仙客

恠來遲病回，已覺詩情減。却為情多強賦詩。

書趙寺正式輓詩卷

下哭亡兒上老親向來無地不悲辛身從執紼衝山雨
手為抄詩付梓人今日我來翻弔汝故園書到轉傷神
白頭竟作殊方別地下相逢恐未真

其父封君後
七日卒于家

守靜先生壽七十五加少師等秩以詩陳賀一
首

榜下衣冠笑兩翁晨星落落幾西東每輸壽骨年年健
且愛官銜字字同舞袖裁成新樣錦庭花開勝舊時紅
古稀餘算從頭數五賦幽詩七月風

補壽白太夫人次卷首轆轤韻

壽筵芳酒出黃封
九日春光半未窮
東閣衣冠前度客
北堂圖畫舊時容
眼看喬木年年大
手種蟠桃樹樹紅
報道郎君重賜玉
藍田佳氣晚還濃

孟冬五日冒雪出城簡邵國賢都憲喬希大侍
郎崔世興員外

十月朝時擬出城
總因公祭輟私情
一冬風景初逢雪
數里關河不計程
旋拂朝衣乾更濕
未占天意雨還晴

相看莫問悲歡事不是當年向子平

次遂菴韻二首

一官心事苦難償筋力空驚六十強病後漸看留客少
老來翻愛作書狂南園折柳逢秋色北郭看山帶夕陽
數月閒情今兩度餘生消得幾回忙

丈夫弧矢志終償精力君應較我強定遠功名那用達
子陵風態且須狂東遊闕里瞻文廟西上金山望岳陽
回首漢家營牧地夢中猶覺簿書忙

出郊

雨後蒼苔入徑深
放朝聲裏得追尋
好風晴日中元節
白露清霜半夜心
城外看山猶舊色
井邊移樹已秋陰
公家事在何時了
莫恠癡兒淚不禁

憂旱二首

正德五年齋居作是
歲有旨致齋九日

鈴索聲低別院深
每從窗牖問陰晴
五風十雨清朝事
七戒三齋聖主心
平野烟雲春澹澹
禁城鐘鼓夜沉沉
天瓢莫道無多滴
一滴須教比萬金

不向田苗試淺深先勞礎石驗晴陰黃塵赤日村村路
側枕疎窗夜夜心江鴈影稀看欲盡林鳩聲遠聽俱沉
清風明月非無價好雨從來不論金

喜雨二首疊前韻

出門黃霧隔城深下馬玄雲匝地陰莫道蒼生空有望
誰言造化本無心庭前翠竹飛還舞水面遊魚躍更沉
擬效坡翁重作記上天今已雨黃金

誤占元日到春深百日都無十日陰五月逢秋農父望

六年憂國老臣心
盆荷色淨塵初洗
庭樹聲收日已沉
縱使田園生意足
翻令土價直黃金

哭方石先生次林待用都憲韻二首

海天江樹晚依依
一別平生萬事違
公論底須他日定
宦途剛得幾人歸
閒看物態雲千變
老謝功名手一揮
猶記玉堂風月地
至今東壁有餘輝

六年不見先生面
數月猶煩兩寄書
病裏詩篇心不廢
老來江海氣全除
塵生滿地空懸榻
腹痛何時許過車

宦況為君灰欲盡東風何事強吹噓

聞劉東山遇赦值河西道梗未得歸次前歲所

寄雪中過六盤山韻

百折危途寸步間向來空乞一身閒
愁心正擁藍關雪苦句猶傳飯顆山
病後形容應漸瘦老來歸路轉多艱
洞庭風景依然在為問扁舟幾日還

此詩再閱歲久不和是日得東山公赦歸重經
六盤山韻因憶元白梁州之句悵然感之再次

一首

浮世功名夢覺間
夢時何似覺時閒
南來已踏千重浪
西去還經萬疊山
我病不堪思往事
公才猶可濟時艱
詩成漫憶梁州句
一夜神交信往還

雪月夜觀水精碁戲作

雪月光中夜未闌
楸枰亂落水精寒
情貪白戰停杯久
眼入空明下子難
長恠官曹無暇日
偶從愁裏得奇觀
撫鬚呵手非吾事
聊復燈前凭几看

亡女生日

十年辛苦住天涯每恨逢生不在家今日賀筵翻吊客

舊時歸路有靈車夢中匏實空題字

女沒時其母夢一匏裂為二上有子

分二

身上宜男枉佩花自然辦香澆麥飯日斜燒紙到

昏鴉

食柑遂菴宅有感

一枝初寄洞庭舟落爪餘霜散不收弱女憶時緣病渴
故人別後已驚秋空將舊恨埋黃壤更有鄉心上白頭

歸共細君還向說燭痕和淚與雙流

除夕

獨吟孤坐總傷神誰伴長安守歲人卦數已周無那老
年華初轉又逢春思親淚盡空雙眼哭女聲高徹四鄰
還向燈前添舊草擬從新歲乞閒身

借得紅梅一株盆花盛開偶與遂菴太宰輩觀
之漫賦一首借梅者崔甥世興

休勞北客問南枝綠影紅香信有之滿坐光風流轉地

半窗晴日上來時
煖貪春睡濃如酒
冷笑霜髭白為詩
今日定知誰是主
客來聊與倒芳卮

喬希大宗伯將赴南京例贈一首

耻隨桃李比芳穠
面目雖同格不同
酒興判教三日醉
病顏輸盡十分紅
頻開戶牖延春日
旋設團屏護晚風
獨有離人心正遠
折時須更向江東

諸公過西莊聯句走筆次韻

一春花信苦多風
勝會真憐一笑同
愁劇老懷兼抱病

憂深時事敢論功杜陵醉後身猶健司馬才高賦更雄
對客揮毫休我羨衰顏不似舊時紅

再次一首

一從桃杏領春風澗草巖花處處同載酒似憐花有約
催詩却笑雨無功釣心偶向閒邊發棋力翻於醉後雄
餘興不隨芳事了盆梅猶自待人紅

得東山翁到家書再用前韻二首

數畝茅堂水石間此身方得是真閒吟髭白可供新句

老眼青猶識舊山年至尚餘精力健家貧偏覺歲時艱
梧桐自有安棲地不似空林倦鳥還

莫論天上與人間纔得閒時始是閒
郢客調應歌下里謝公家自有東山
憂時更覺江湖遠閱世方知道路艱
當日賦詩無送者天教夫子竟生還

益高亭為何生子元作

亭取韓文山益
高水益駭之義

衡山南去路孱顏萬丈丹梯尚可攀
望盡楚峰還越嶠定知天上與人間
當窗列宿長圍繞拂地流雲自往還

多少洞庭湖上客盡從清瀉聽潺湲

五月初七日

正德
辛未

六年揮淚泣遺弓萬國傷心此日同
龍去鼎湖還作雨
馬嘶沙苑尚思風
碧桃宴已歸天上
玉几言猶似夢中
曾是白頭香案吏
不勝凝望朶雲紅

西莊遇雨

每逢佳景即登臨
百度曾無一度陰
今日我來翻愛雨
舊時人去轉傷心
空堂五月炎蒸盡
野色千家草樹深

最是晚來沾濕地不勝涼思滿衣襟

中秋獨坐

客去西堂話已終
自隨巾屨步涼風
輕陰冉冉來天際
澹月沉沉出海東
戰後兵塵新恨滿
別時兒女舊愁空
一朝兩報三軍捷
莫道歡顏是酒紅

次日疊前韻東邃菴

百年心賞故難終
人負佳期昨夜風
豈有好詩生眼底
誤疑明月在鄰東
花能再發人將老
客不頻來酒未空

今日定知何似景斜陽先愛晚山紅

九日崔郎小會

共坐西軒納晚涼滿城風日愛重陽苔因雨積猶餘綠
菊為霜遲且未黃病裏山林心轉癖老來兒女意偏長
向時憂樂誰先後莫問江湖與廟廊

生日有感

六月九日多鬱蒸我生初度未相仍黑頭漸白白且盡
碧山欲歸歸未能閉門絕客祗僚友竊祿作官猶斗升

獨把一杯還自壽
瘦軀衰病恐難勝

懷麓堂集卷五十八

欽定四庫全書

懷麓堂集卷五十九

明 李東陽 撰

詩後稿九

七言律詩

孫司徒饋雪酒與衍聖公崔郎中共酌

玉堂茶鼎不須烹已讓江南雪酒清一種奇香非世有
六花新釀隔年成晉書光憶貧時映郢曲歌傳醉後聲

剛是兩郎留賞地敢將冰比玉風情

湛編修若水冊封安南

聖朝荒服盡冠纓嶺外交南舊有名文字不隨言語別
道途長共海波平一家兩被周封命六載三回漢使旌
天上玉堂非遠別故鄉重慰倚門情

偶夢得一詩止記末句覺而感之足成一律正
德辛未十一月九日也

平地紅塵起白波直從青兗到黃河幾州村落人烟少

千里川原殺氣多
漢帥屢傳師出令
邊兵先試凱旋歌
白頭中夜長憂國
何日蒼生免荷戈

數日後再夢一劄
有天兵所至罔不
克捷之文
疊前韻以自慰

北風吹浪不成波
賊騎乘冰欲渡河
甸服以南烽火衆
天兵所至捷書多
心懸五夜趨朝夢
耳聽三軍擊斗歌
已喜文臣能敵愾
須教武庫戢干戈

地震齋居國賢侍郎以詩來自通州次韻一首

獨坐空堂別院深
不堪無酒更無琴
雙垂短雪衰年鬢
寸結寒燈半夜心
露禱似聞天上語
遠書如聽谷中音
朝來整笏趨朝地
鐘鼓樓高月未沈

崔甥後借紅梅病起次舊韻二首

新花還發舊年枝
一種春風兩見之
醉眼似曾相識後
芳心多在未開時
若逢孟老偏宜雪
恨少林逋別賦詩
病裏絕憐無客到
有誰傾倒共深卮

誰借江南玉樹枝
崔郎風格似宗之
休憐客路春深地

猶及花神酒半時
羞比杏桃吟鄭句
不勞冰雪禁歐詩
愁來春興都無幾
盡日相看不滿卮

喜雨疊前韻簡邃庵

老年風骨歲寒枝
人意花情兩得之
病後朱顏還誤酒
春來好雨正逢時
花緣別久應思主
我為愁多彊賦詩
寄謝東隣楊太宰
肯將涓滴共開卮

邃庵以詩來訂花朝之約次韻趣之

休論東閣與西涯
城市山林總未賒
已喜孤根回暖地

可將奇賞負詩家心雖鐵石能無賦畫恐丹青却累花
明日此花還此客有人爭向玉堂誇

邃庵攜酒就梅再疊前韻

有客遙從楚水涯攜來新釀不須賒花朝且共長安節
雪夜全勝處士家錯訝仙丹紅似雪翻憐醉眼白於花
君才正合稱三絕併與詩人一處誇

疊前韻與崔郎

庾嶺南頭灞水涯長安春望眼中賒須知水部郎官興

不在玄都道士家
癖愛苦吟呵凍筆
醉移清賞落燈花
向來花主真誰是
好事翻從地主誇

聞邃庵自得紅梅再疊前韻

載酒尋梅興未涯
移栽仙館路何賒
冰霜晚節元同調
桃李春風別是家
三弄已聞琴入操
五更應夢筆生花
芳隣擬卜千金價
老朽從今莫浪誇

近日紅梅倡和頗多
當職思其外之時
有好樂無荒之戒
再疊前韻以識吾過
并簡諸君子

不愛風葩與露枝此花心緒我知之老當萬木俱凋後
愁對孤燈半結時多事不勞須載酒有懷應憶舊題詩
相看只合無言坐小泛清茶當一卮

大江南望渺津涯水涉山行路總賒內苑移栽雖得地
北來漂泊似無家閒愁未解雙看縛老恨從添滿眼花
留却一枝還舊主任將春色與人誇

有菊為醫士盛煜作

幽人種花花滿家此花之外更無花懶隨桃李爭春色

且共參苓閱歲華青眼舊憐携綠酒白頭低受挿烏紗
不須更酌南陽水自引香泉灌藥芽

走筆次成國病中見寄韻

病起如聞春酒香老來猶作綵衣郎方傳靈藥從人乞
手雪仙桃奉母嘗五月嘉辰懷往事四更清夢繞朝行
嗟予亦抱文園渴漫倚高歌到夕陽

五月七日

正德
壬申

曾上鑾坡侍玉堂朝衣親惹御袍香傳宣煖閣

在奉天
門後

天顏近奏事平臺

在中左門東

午漏長化國有人悲短夢幽

都無地仰餘光從容顧命分明語一日傷心淚萬行

聞河南捷

山東羣盜復河南血戰中原萬蟻酣守似墨城誰却九
捷如曾杼尚疑三潛行不覺關山隘屢餌深防將士貪
剛道羣亮真授首又聞舟楫下江潭

聞狼山捷用前韻

北風吹捲洞庭波飛舸還經孟瀆河今日勝兵方有筭

向來遺孽本無多中宵驛使傳書捷兩岸歡聲入棹歌
聞說西南猶轉戰幾時甘雨洗天戈

楊少卿廷儀歸省成都石齋閣老以長卷見屬
請紀其事少卿子已未所舉士也

五色文章使我驚十年京國愛君情表卿奉職先郎署
蘇轍傳家有父兄城上花明新衣錦橋邊人指舊題名
誰言蜀道如天遠萬里星槎自在行

易檢討舒誥歸省長沙院中例贈

行盡星沙更月橋始知天上有歸橈宮衣尚帶香烟濕
仙佩還隨玉露飄已向江山開壽域細將文軌說中朝
西來青鳥南飛鶴萬里雲霄路未遙

吳禮部克溫來自南京靳克道學士賦詩會別
次會子家用韻一首

淹留不厭腐儒食風度惟君世所難茶笑陸生親設具
碁如吳起慣登壇聊將短日供長話漫以新詩續舊歡
莫向南船驚朔吹曉晴沙路雪初乾

成國省墓北澤山奉贈一首

二王祔葬六陵東
丘壠成行列上公
千里疏陳朝闕後
十年心切望雲中
河山帶礪君恩遠
俎豆春秋祀事同
地下有靈應暫笑
郎君今又作元戎

七言排律

春寒二十韻

軟紅香裏見車塵
剝取餘寒在水濱
飛霰有時還著面
微霜何力尚欺人
湖波欲動清猶淺
草色初回綠未勻

捲盡簾櫳無燕雀閱殘冰雪但松筠吳牛月下琉璃薄
胡馬風前首宿新作態簷花如怯語多情堤柳似含顰
朝衣試換應嫌早市酒從酤莫厭醇賜擬宮恩傳漢燭
別憐歸思遶江蘋山牆地圯蟲仍蟄海國天高鴈始賓
辟愛火犀曾貢粵歌傳土鼓漫吹幽哦詩轉覺吟肩聳
游統難醫病手鉞未放韶光過九十肯拋長夜守庚申
瓊樓玉宇騷人遠舊穀新絲野客貧甲士夢驚曾徹骨
緝髮心苦更傷神綈袍范叔誰相戀大被姜郎且共親

萬厦直須酬老杜重裘幸免作窮陳年華草草催雙鬢
宦跡悠悠寄一身愁引凍泉分浙瀝怕登高閣看嶙峋
每慙溫飽謀生拙一任炎涼過眼頻從此願持鄒衍律
遍教陰谷是陽春

壽鶴溪潘先生八十

越山雲氣鬱崔嵬家住天南紫翠堆溪上鶴飛知客到
籬邊蝶過識花開繁苔滿地時嗔掃野服隨身更懶裁
靜撚吟髭還得句健拋竹杖獨登臺抗顏正對橫經席

袖手旁看作郡才矍鑠尚能驅左馬幽閒且可種三槐
初心道德終無負末路功名底用媒孤賞最宜樓有月
舊貧剛免甑生埃空羣冀北人猶羨捷徑終南世敢猜
甲子數休論絳縣神仙居不在蓬萊堂成綠野千年後
節近清秋一日纔堪寄興惟林下竹未忘情是嶺頭梅
絲蘿愛托青松樹海水憑添白玉杯歌罷琅玕如許和
願從江鴈得書回

聖駕視學有述

翠華重匝護金根鑾駕從容下玉闌一雨隔霄清輦路
五雲先曉覆橋門中天地迴乘龍御在廟心勞想駿奔
禮樂百年昭象設衣冠三代藹雲孫拜瞻共識師模重
坐講方知聖道尊履上仙班星只尺耳聞天語玉清溫
鳳團賜茗公卿貴難舌分香侍從恩敢謂文章非國運
故知籙豆有司存休風合遣羣方動盛事仍兼往代論
從此六經功久大須將覆載比乾坤

生日遂菴太宰貺以長律用韻自述并答雅懷

莫將箕斗問星躔花甲周時又五年抱病每憐唐杜甫
謝官方慕漢韋賢頭多白髮生新種坐祗青氍是舊傳
豈謂詩書非閥閱縱居城市也山川義方獨守韓公訓
仁里三懷孟氏遷恩許曲江蒙燕賚禮開東閣誤招延
黃扉忝職經綸重玉几親承顧命專犬馬有情難報主
鈞衡無力可回天同心論議思金斷末路功名笑瓦全
已愧元方曾有季却悲顏路早亡淵空驚節序忙於我
頗恠聰明不及前欹枕欲眠頻覺警杖藜將步轉愁顛

如過漆室遙聞歎誰為蒼生倒解懸
况值叨勞傷短日
敢耽荒樂醉長筵
鏡中勲業今衰矣夢裏江湖更渺然
大義曷能逃覆載餘生何以謝陶甄
家藏筆法猶存譜
手按琴徽錯記絃
公退久遺鰲禁直友聲先和鳥鳴篇
錦衣肉食非吾樂
藥操冰心宜自堅
惟聽玉皇宣放勅
願從平地學神仙

邃菴太宰先生初度疊前韻奉壽

兩翁星命不同躔
後甲先庚僅十年
天祿閣中慙我老

文僖門下識君賢
聰明德祖才無敵
清白關西世有傳
藩府早時通姓字
地靈隨處託山川
東堂漢試曾三捷
外制唐官始一遷
滇騎北來經海嶽
晉軺西去歷廊延
龍駒萬匹飛驤滿
虎旅千羣節制專
夙夜在公長體國
行藏自我亦由天
纓冠義切煩趨赴
鼎釜生餘藉保全
寶劍直應光射斗
明珠何止媚藏淵
班行迴絕星辰上
人物分明藻鑑前
寒士力能吹羽落
蒼生手可救崖顛
秋風梓里頻勞夢
陽月桑弧此再懸
已荷投桃敦友誼

寧辭伐木共賓筵
童時鬢髮今皤矣
醉後心情各醒然
合志豈能忘括羽
相逢多道出陶甄
公庭坐遣平如水
大道從知直似絃
臺省疏傳金鏡策
山林興寄白雲篇
中朝儀表衣冠盛
後代勲名竹帛堅
願與八荒同壽域
不妨官府是神仙

懷麓堂集卷五十九

欽定四庫全書

懷麓堂集卷六十

明 李東陽 撰

詩後稿十

五言絕句

雜畫二首

種樹自何年
幽人不知老
不愛松色奇
只聽松聲好
野樹兼天暝
山鐘度水遲
詩僧不出戶
頭白少人知

又一首

仰面看飛鳥，彎弓意轉遲。
馬頭雙獵犬，惆悵立多時。

芙蓉

濯彼秋江上，脩然風霜姿。
世間無一物，惟有謫仙詩。

西園秋雨

竹

秋雨爛百草，青青脩竹林。
解使秋聲爽，還令秋色深。

椿

舊樹已十圍舊宅今易主新樹日以長秋霜復春雨

檜

雙樹出牆頭亭亭雨高蓋雨色愛青蔥天聲聽靈籟

榆

柳外春烟碧桑邊暮景斜退朝無一事風雨送年華

桃

種樹乘春雨開花待曉風一年還一樹隨意滿園紅

李

名果出吾家移栽自海涯要看花勝雪先放雨催花

芍藥

秀色春前發濃陰雨後看持盃賀花相先我得休官

木槿

花開不及暮根老却宜秋天機何處在須向靜中求

蓼

的的垂紅雨蕭蕭映碧流吳江誰解剪剛得數枝秋

繡墩草

野草不繡地青青常覆盆風朝還雨夕留客意終存

苔

豈不愛佳客客來殘我苔西園十日雨三徑不曾開

藜

藜新尚可蒸藜老亦堪煮明年幸強健拄杖看秋雨

後西園秋雨詩

予往歲秋雨中嘗即西園植物各為小詩十二首

今年病告累月幽懷莫伸復即所見得十首

雨來催我竹十日忽成林
筍出無人見蒼苔深更深

右竹

雨色澹西莊風光戀北堂
存亡各異地憂樂兩難忘

右萱

去年長比人今歲高過屋
好雨東南來依稀滿庭綠

右槐

畫省和雲植幽庭帶雨看
會辭雙闕迴歸託一枝安

右紫薇

買種已經年貪看亦云久未惜雨沾衣應防刺傷手

右茶蘼

芳華曜朝陽餘景駐晚色縱是雨成霜白頭心更赤

右葵

一月一花開花開應時節未須誇雨露慎與藏冰雪

右月桂

未摘霜前實先看雨後花名應出西海顏豈論東家

右榴

風花晴可憐雨實秋更好日日望江南終當此中老

右望江南

春草萋萋欲黃秋草萋萋更碧莫太倚春光方當讓秋色

右草

七言絕句

號國夫人早朝圖

掃罷蛾眉上馬遲君王剛及退朝時侍臣記得丁寧語

莫遺長生殿裏知

采

誰寫西園數葉松
露華清曉濕蒙茸
玉堂夜半蘇郎渴
此味無因獻九重

兔

蘼蕪原上眼迷離
好是空山獨坐時
老去獵心翻欲動
似嫌孤隼下來遲

菊花

寒影蕭蕭照墨池
西園晚色正相宜
蒼頭黑髮秋風裏

應足陶翁未醉時

蓮花

不見峰頭十丈紅
別將芳思寫江風
翠翹金鈿明鸞鏡
疑是湘妃出水中

芙蓉

輕紅澹白兩堪憐
妙意皆從畫史傳
不用秋江照顏色
也知標格是天然

梔

抽黃媲白總稱才誰遣山梔入畫來似為詩家少知己
杜陵吟罷不曾開

水僊

澹墨輕和玉露香水中僊子素衣裳風鬟霧鬢無纏束
不是人間富貴粧

牡丹

綵毫和露寫名花紫豔分明出魏家應是洛陽歸夢遠
緇塵紅土半京華

題褚臨蘭亭後二絕

晉代書家失典刑
河南別自有蘭亭
寧知千古風流興
只在山陰酒未醒

晉帖唐臨太未遲
還從點畫認鬚眉
向來賞極翻成恨
不見當年運筆時

何敬仲墨竹二絕

奎章博士本書家
畫法翻將上品誇
鐵鎖銀鈎誰解道
人間空夢筆生花

莫將畫竹論難易
剛道繁難簡更難
君看蕭蕭祇數葉
滿堂風雨不勝寒

子昂畫馬

家家龍種墮燕山
猶在秋風十二閑
千載畫圖非舊價
任他評品落人間

觀泉圖為衍聖孔公作

松根東望思悠哉
濕盡春衣滿地苔
七十二泉雲霧裏
可能持贈一泉來

春園雜詩十四首

三月三日佳麗辰五十五年衰病身
閉門一枕午時夢
江草江花無數春

病來無力與春爭看盡花開草又生
莫道東君不識面
舊紅新綠也關情

牆陰老槐生古苔棘籬花迺參差開
分付兒童莫謝客
病中那有俗人來

桔槔亭邊非我家城南小園綠水車
直恐此身終是客

門前有地不栽花

木槿花開紅作屏
庭前莓苔滿地青
綠陰深處不知曉
啼鳥一聲幽夢醒

手插河邊楊柳枝
眼看成樹復成絲
不見雪花飛滿地
豈知春去已多時

野鶴昂昂不受馴
家鶴依依鳴向人
應悔城中食烟火
不如天外離風塵

庭下獼猴如小兒
攀花折果不停時
為憐野意厭羈馭

放著林間高樹枝

三年種竹不滿地長恠牆高多夕陰縱使難成也難老
莫教移却種花心

夜來一雪忽成雨雨過西山青入樓聽人騎馬看山去
又作思山一種愁

徑草園花隨意春野情偏與物相親養得山家短角鹿
盡日閒行不觸人

剛道假山如畫圖畫圖還是假山無若見此山真面目

縱非南國也西湖

房山山房山下頭十年不到水空流
園童捉魚自煮喫只道山中無釣鉤

慈恩寺前花滿洲看花長記小年遊
春光撩人不知老夜夜夢到水西頭

木筆

泚露和烟曉未乾多情獨自倚闌干
春風為報真消息不似江郎夢裏看

蜀葵

羞學紅粧媚曉霞
祇將忠赤報天家
縱教雨黑天陰夜
不是南枝不放花

黃葵

不隨紅紫鬪紛華
別有風流出畫家
誰解人間真正色
秋來交付與黃花

玉簪

昨夜花神出蕊宮
綠雲裊裊不禁風
粧成試點池邊影

祇恐搔頭落水中

春草圖二絕

江南春草綠如烟
多在東風十日前
還憶謝家池上見
對床聽雨賦詩眠

渚蘭汀草亂春愁
病裏何心更出遊
獨立斜陽溪上望
采芳人在白蘋洲

四牛圖

丙吉問牛

不問僵屍問喘牛春來多少廟廊憂燮調知是三公職
只許當年曲逆侯

劉寬還牛

笑解轅驂緩步歸野人多事轉相疑司徒喜怒元無迹
牛去牛來兩不知

牛羈殺牛

徒步歸來了不驚車前流血任縱橫一牛自與秋毫重
得似人間骨肉情

李密掛牛

倦來不作帶經鋤掛角歸時日未晡道上達官應借問
傳中曾讀竇融無

濟醫馬圖

王郎愛馬癖成癡病馬情多手自醫馬病祇應醫便得
不知醫癖更須誰

黃子久山水

子久丹青仲舉詩百年風物兩稱奇分明一片江南景

醉後相看醒不知

劉松年山水二首

九曲闌干十丈泉
隔溪幽樹轉蒼然
携童莫道尋師晚
猶在秋山落照前

醉倚孤蓬坐不眠
夜涼吟向沈寥天
松陰正好看明月
分付兒童莫放船

刻絲牡丹二絕

組織兼成刻畫功
好花芳蝶共春風
摩挲舊物尋遺事

不是唐宮也宋宮

鄒碧堆紅間淺深都將一賞付分陰誰知造化無雕刻
費盡人間巧匠心

書歐陽公手帖後二絕

醉翁長恨作書難道是撐船上急灘畢竟晚年多自得
儘留風韻與人看

宋代家書自不孤當時只許蔡君謨若將晉法論真印
此老風流世亦無

寒山拾得圖二絕

閒向青山掃白雲
青山那得有紅塵
白雲飛散紅塵盡
山色長如清淨身

爨松燒竹自為徒
炊罷吟詩對竹爐
應是禪家風味別
世間烟火氣全無

王孟端山水圖長卷二絕

畫竹休將竹史看
王猷家自有江山
空庭莫訝千尋影
萬里烟波咫尺間

高下青山遠近村
清江處處繞柴門
鑑湖一曲消多少
須問君王再乞恩

蒙翁蒲萄次韻二首

采采西林白露團
一時清賞故人歡
蕭條四十年前事
又向誰家卷裏看

西土蒲萄別樣團
謫居聊此寫清歡
荔支香水誰高下
且與詩人一例看

法酒一尊奉致二泉都憲侑以小詩

玉露金莖下九天風情猶記十年前莫言天上無多滴
欲關人間第二泉

使回聞欲封寄江南蓋將以為北堂之壽再致
一語情見乎詞

行厨新甕不開封留向高堂手自拱若比江東懷橘意
洞庭春色定誰濃

捕魚便面為厚齋閣老題

漁家生事苦難勝盡日江頭未滿罾回首不知天已暮

晚風吹浪濕鬢髻

饋萱遽菴太宰侑以一詩

雨後宜男色更深采來新自玉堂陰紫葵紅藥標題遍
可忍黃花獨苦心

成國內弟有憶陶鼎詩見寄次韻二首

列鼎朱門非我事楚人家自有泥鐺如何南國三年別
猶記西堂一夜羹

朝回閉戶無佳客獨對陶家老瓦鐺忽向春風起秋興

江東何處有萼羹

題沈啟南畫二絕

蔓草叢花滿世間
石田胸自有江山
君看絕頂孤眠處
萬仞高風未可攀

欲向高臺一振衣
恐驚黃葉徧山飛
不如抱膝還高卧
閒倚長空送落暉

題李伯時蓮社圖二首

誰寫廬山十八賢
白頭居士老龍眠
樂囊經卷隨行杖

如在香港瀑布前

蓮社風流隔市朝，共將身跡混漁樵。
陶翁心事無人識，聞道攢眉似折腰。

恭題景陵御筆花鳥圖後二絕

文華殿裏日從容，花鳥閒情藻繪中。
莫向人間問開落，碧桃天上幾春風。

花滿平川穀滿田，眼中風物總堪憐。
高飛俛啄皆生意，猶憶先朝大有年。

題崔甥畫卷 有序

禮部郎中崔甥世興得中書焦瑀家畫卷十幅皆
正統天順間一時名筆內有子詩十首跋一通皆
書警齋而字畫圖印絕不類疑其偽也間以質予
予筮仕時實有此號及諦觀其詩漫不知為何等
語也因念弱齡釋作忽忽四十六年而卷什完整
如故且跋云每幅空其半以俟他日更為之今焦
氏以錦衣貴族已就凋落所藏書畫亦散佚不守

而予復見之獨非有所俟而然乎世興以為奇請
踐前語乃各次舊韻填諸紙空復識其後而歸之
且以原韻并跋各附于稿後亦庸以自考云爾正
德壬申二月七日西涯李東陽賓之識

不見春風轉綠蘋山中那識歲華新試看剝啄門前客
莫是坡翁夢裏人

行盡青溪見白蘋中林蘭若晚鐘新不因犬吠疎籬

下空谷誰知更有人

警齋
右訪友圖

谷口長松澗底藤石橋山路晚登登囊琴斗酒來何暮
空負寒齋昨夜燈

斷岸垂崖百尺藤柴門無徑有誰登孤舟十里山頭

客共話西齋一夜燈

警齋
右訪友圖

遙向秋江溯碧空晚風涼月共開蓬數聲長嘯三更話
多在千山萬木中

櫂歌歸去水連空十里青山一釣蓬同是滄浪濯纓

客相逢醉殺月明中

警齋
右漁舟圖

江上秋風生白波
孺子解唱滄浪歌
歌長日短不知暮
回鴈峰頭烟水多

荻花江上水增波
萬里秋聲入櫂歌
十二樓臺何處

所滿天鴻鴈夕陽多

警齋
右山水圖

紛紛紫陌任紅塵
轉眼新花換舊人
何似水邊兼雪後
老年還是少時春

翠袖娟娟不受塵
水邊長伴一閒人
多情只有孤山

月猶照西湖十里春

警齋
右墨梅

萬紫千紅漫作羣一枝端可拂青雲不緣風格高如許
誰遣坡翁記墨君

獨立風霜意不羣勁扶蒼翠入青雲天涯歲晚相逢

地惟有清風得共君

警齋
右墨竹

衆芳搖落盡堪憐多在江南歲暮天獨有孤根隨晚節
老來相對不知年

白石幽篁也可憐况逢枯木半參天江干歲暮無人

地露泣烟愁定幾年

警齋
右古木圖

鵲聲人語共分明夢覺高堂了不驚報道乘龍消息好
恹來終日傍門楹

青春毛羽獨分明盡日相看總不驚踏遍殘枝君莫

惜好將春色到簷楹

警齋
右雙鵲

渺渺平沙落鴈斜夢魂疑在水西涯多情不似江南雀
猶向沙頭啄柳花

水淺沙寒日易斜數聲遙在楚天涯哀歌忽斷秋風

起落盡寒蘆兩岸花

警齋
右蘆鴈

休論澗碧與山紅
雨篴風翻定幾叢
欲向春光題品遍
老來詩思十分慵

石竹山丹紫間紅
刺藤黃菊兩三叢
春心也羨東園

蝶百遍相過思未慵

警齋
右花草圖

今年夏予在史館中
書舍人焦廷絜亦有事于館中
持所藏畫卷十幅請予題編閱之暇輒命筆為八絕
而止越數月廷絜復以卷抵予家請識歲月披而閱
之則嚮所為者皆應答語甚不滿意始欲為長句續

之而俗事纏繫弗果也廷策使凡幾至則又為二絕
歸之仍每幅虛其半以俟他日興到當復為之耳成
化丁亥十月晦警齋李東陽題

戲嬰圖

都將白日付青春戲舞閒行意態貞聞道棘門還細柳
潢池空有弄兵人

東湖圖

湖水東頭孺子亭十年人地兩相靈憑誰為酌湖中水

一洗人間醉夢醒

高山圖


行盡深山覓紫芝不應名姓有人知閒來共說人間事
楚漢分明一局碁

遊春圖

三月江頭花滿枝春光物物總宜詩杜陵野客猶多興
不是潛行痛哭時

海日圖

浴日亭前水不流長空滉漾與雲浮坡翁只解中宵過
虛詫平生萬里遊



懷麓堂集卷六十

欽定四庫全書

集部

懷麓堂集卷六十一至三

詳校官監察御史_臣范衷

中書_臣劉源溥覆勘

總校官編修_臣王燕緒

校對官待詔_臣胡士震

謄錄監生_臣劉澹

欽定四庫全書

懷麓堂集卷六十一

明 李東陽 撰

文後稿一

賦

東山草堂賦

為華容劉先生時雍作

東山居士行自京師將歸於故園涉泱泱經嶺岼掃瓦礫笑
蕭管葺草堂之舊構啟衡門之幽闕於時洞庭無波萬里一

碧飛鴻倒影下映千尺長林落木響應川谷高山大壑俯仰
寥廓嗟吾生之歸來寄一感於今昨乃進子姓而告曰吾今
而得返於斯也蓋方舉甲第登郎曹北窮幽薊之墟南盡楚
粵之郊畫省凝目蘭臺麗霄高居迴瞰遠絕塵囂而或江颿
夜發星輶晨驚水宿風餐冰行雪度呀豺虎之噬人莽荆榛
之窘步驚突黔之靡定寧足胝而不顧念王事之鞅掌憂歲
華之遲暮眉顰為之莫展領髮為之垂素幸吾堂之尚存恍
風景兮如故孰謂三紀之餘數千里之外望斯堂而歸歟且

堂之始作也吾祖遺其模吾父諦其規據雲夢之名勝攬荆衡之幽奇人與地而俱靈事隨年而屢移吾嘗植松為林種竹成嶼旁引烟霞上蔽風雨傷俗駕之猶滯慨山靈之無主覽物象於羣動悲乾坤於一旅時偶得兮暫息聊斯堂兮容與欣壯稚之相從若有感乎斯語於是散髮曳杖載遊載歌朝出暮還左挈右摩天壤之間此樂孰多人生適意焉卹其他客有過者見而問之曰子非治河之中丞乎非行邊之貳卿乎胡不軒蓋是

擁而布韋是嬰也居士不對客亦就退如有歌聲出於戶外者其辭曰吾山兮在東吾堂兮在中吾不歸兮將安從又曰少而行兮老則歸稅繡服兮被荷衣今吾故吾兮何是非人不吾識兮天吾知聲未竟客行已遠不能悉聽也賦而識之以告知者

後東山草堂賦

東山居士再自京師而歸也乾清坤夷風恬日熙山將水迎猿欣鶴嬉感萬類之咸遂嗟行樂之及時卸驚颿

於陸海解故繫於天羈爾其雨過湖平涼生秋杪心送
馳波皆決飛鳥稅駕乎九達之衢振衣乎千仞之表倏
雪開而霧散豁塵夢之初曉覽宇宙之無窮逮吾生之
未老非遯跡以遺世聊閉關而却掃客有剝喙之聲徹
於戶內者居士曰子其誰哉客曰囊昔之歲過門而問
聞歌而去者也乃與之坐而語曰子之不相聞者九年
於是矣茲者惠然過我其有謂也耶客曰昔子之來之
韋裳布裘以木石為羣與漁樵者遊爾往我還爾歌我

酬自君之出矣衣錦食肉駟馬高蓋朱丹其轂奔走屬
吏控制藩服絕我跡於雲泥貴爾音於金玉幸逸足之
可攀庶前盟之有續云爾居士曰噫噓噓是誠何心哉
當夫事劇嶺海志移山林觸炎埃之勃鬱歷遠道之崎
嶇身有所不敢潔口有所不得瘖詔使沓至天威載臨
奮疲庸於鞭策起廢疾於呻吟固欲趣嚴裝以赴召向
國門而挂簪及乎預運帷之密命承側席之虛襟責負
山重恩同海深思趙宣之假寐惜陶侃之分陰已而抱

號弓之往恨聽擊壤之新音閱寒暄之代謝懷止足之
規箴懼血氣之既衰為富貴之所淫諒今之不能為昔
猶昔之不得為今也客憮然久之曰吾儕細人朝饔夕
殮觀山而不窮其巔望海而不極其源以皦皦為能以
孑孑為難寧獨知大羹不調大玉不琢招之而莫致其
來撓之而不見其濁此賢者之不可測也信斯言之則
然遂為之歌曰楚之水兮荆山望佳人兮不還翩然兮
歸來躡宮雉兮弄潺湲彼世間兮何物吾之樂兮吾天

又歌曰桂棟兮蘭房君歸來兮此堂山可履兮水可航
彼胡為兮天一方歸來歸來兮樂不可以極願從子兮
徜徉居士莞爾而笑曰今日何日故吾今吾出我處我
天乎人乎呼我者應以為馬愛人者必及其烏疑我何
深見我何粗獨斯堂之在山終不改於厥初不與世而
推遷不隨時而毀譽匪是物之有恒吾何恃而歸歟於
是舉酒屬客客亦大噱嶽雲漸開江月將落逍遙象外
俯仰磅礴居士達觀靜慧蓋將後天下而樂也

石淙賦

石淙地名也為遂
菴楊先生應寧賦

聳山骨兮峭嶸中潺湲兮水聲初濺涓以汨滴忽砰湃
兮鏗錡或在遠以疑近恒自昏而徹明感天機於一觸
衆籟為之不鳴信江南之絕境乃萬類之至精彼瀑布
兮可擬曷蹄涔之足稱爰有三南居士比象引義取石
淙以為名客從湖南而過者曰此非洞庭之波乎碧浪
千頃青山一螺揖靈秀於衡嶽激清風於汨羅昔予之
既排既屏來遊而來歌興懷於某水之丘寄跡於北山

之阿校風景於毫芒繫孰寡而孰多居士不答如茲淙
何又有自滇南而來者曰此非昆明之漪乎平地仰噴
從天下垂建長江而直瀉指瀚海而同歸昔子之乃祖
乃父生斯聚斯脩星移而地改方挹彼而注茲訝江山
之不可復識抑疇是而疇非居士乃撫然而嘆曰嘻有
是哉吾固知石之為石淙之為淙也吾方手拊鐘鞮耳
聞春撞應噫氣於大塊引希音於清商挾涼颼以助爽
與皓魄而爭光達大觀於無外諒至美之難雙蓋將濯

纓乎萬里之流振袂乎千仞之岡若乃東山在吳以象
舊邦東坡在黃遂名四方彼二東者之偉蹟豈三南之
敢望且夫石者吾知其為堅淙者吾知其為激匪徒觀
物以適懷抑亦將身而比德蓋將礪我粗鈍蠲我宿癖
滌塵垢於七情漱芳華於六籍嗟人生之有涯見道體
之無息彼羣分而類聚何物非兮大極殆不知石之為
淙淙之為石也於是二客攜酒與琴遊於淙上荆班雜
至林歌迭唱北南俱失賓主皆忘慨聚散之殊塗顧行

藏之異尚三人者各適其適渺不知其所向也

奎文閣賦

有序

闕里宣聖廟舊有奎文閣以貯古今圖籍在大成殿之前杏壇之南金章宗重建規制頗精國朝置衍聖公府其屬有奎文閣典籍一人凡朝廷有事於廟則禮迓香幣虔於閣中以俟行事弘治己未廟災而閣存工既就緒殿廡閎麗皆加於舊按察僉事黃君繡謂閣獨弗稱欲撤而新之衆議譁然以為故物不可

廢黃執之益力巡撫都御史徐公源實主之閣成高
八丈有奇畧與殿等棟宇相埒金碧交映向之譁者
始翕然歸之稱全功焉東陽奉勅祭告乃登於茲閣
欲賦其事未暇也徐公既購書數百卷付衍聖公聞
韶令典籍孫世忠守之四方藩郡聞而致者日益富
徐公使告於予曰閣不可負也乃為賦之

偉新廟兮既宮突高閣兮麗空海之右兮山之東極灝
漻兮爭從龍納沆瀣兮超鴻濛表日觀兮來天風忽秋

令兮始肅見奎星兮正中初徙倚兮欄前暫徘徊兮戶外
殿庭兮魏莪與茲閣兮相對亭碑矗兮林立壇屋隱
兮如蓋昔金源兮始構幾歲序兮更代歎軒楹兮未燼
紛瓦礫兮浮塹及輪奐兮鼎成藹冠裳兮咸聚覽舊跡
兮無餘撫孤根兮一檣吁嗟乎靡麗兮娉婷彼齊雲兮
落星悵望兮往營或籌邊兮見京夫豈若覩羹牆兮故
宅誦典則兮遺經宛蚪斗兮孔壁恍金絲兮魯聲感春
秋兮絕筆憶詩禮兮趨庭存奇文兮籀史脫虐燄兮秦

坑藉神鬼兮呵護閼山川兮精英乃有韋編兮竹簡石
墨兮溪藤汗牛充棟兮不可以數計又奚問兮何名幽
并兮青兗渺宮牆兮在眼前景行兮高山每為憾兮不
淺金書兮玉簡幸吾生兮未晚遡秋宵兮愈深恨夏日
兮猶短仰聖道兮彌高思古風兮漸遠閱千載兮一時
曾一慨兮不滿睜逸駕兮可攀尚頽波兮在挽噫噓戲
靈有地兮傑有人賢有象兮國有賓下厚土兮上高昊
軼倒景兮離塵紛博典冊兮窮皇墳厲夕陽兮求朝聞

豈徒析蟲魚兮隱義辨豕亥兮疑真訝雨粟兮天半降青
藜兮夜分蓋方舞干羽兮七旬編絃歌兮八垠占聚緯
兮周髀聽園橋兮成均殆將興兮吾道庶不朽兮斯文
魏乎高哉勢不可以極茲閣之名兮並列宿而俱存

懷麓堂集卷六十一